



Martes, 5 de setiembre del 2017

INTERVENCIÓN DEL PRESIDENTE DEL PRINCIPÁU D'ASTURIES, JAVIER FERNÁNDEZ

Actu d'apertura de la XVIII edición de la Escuela Internacional de Branu *Manuel Fernández López 'Lito'*

Xubida al teyáu de la gran casona, Jane Eyre contemplaba los campos, la estensión neblinosa y interminable de páramos y tierras que la arrodia. Allalantrones, más allá de la raya del horizonte, taríen les ciudaes, esos llugares bullindiegos onde la vida, cuntaben, pillábase a sí mesma.

A ella diba presta-y conocelos.

Jane Eyre, esa moza que naguaba por conocer la vida, ye un personaxe del pasáu. Güei fáisenos impensable, recluyida ente parés de piedra, prindada nesi deliriu románticu que paecía la única ensoñación apropiada pa la imaxinación femenina.

Claro, vais dicir: Jane nun ye más que ficción, una creación lliteraria.

Tenéis razón, pero vamos facer l'exerciciu de pensar qué ye más increíble. Si la protagonista pensada por Charlotte Brönte o una afirmación como la que sigue: "L'esclavu nun tien voluntá; el neñu tienla, pero incompleta; la muyer tienla, pero impotente".

La frase ye real y nun la soltó un torollu, sinón un tal Aristóteles. Esclavos, neños y muyeres, toos nel mesmu sacu de los seres inferiores.

Tamién-y podéis poner oxeciones. Va yá tantos siglos de la Grecia clásica. Volvéis tener razón otra vez. Voi buscar otru exemplu. Empiezo la cita.

"L'home ye torrencialmente egoísta; sicasí, la muyer cuasi siempre acepta una vida de sumisión, de serviciu, d'ufierta abnegada a una xera".

Fin de la cita.



Nesti casu l'autor ye José Antonio Primo de Rivera. Pronuncióla en Don Benito en 1935. Entá nun se cumplió'l sieglu.

Tamién podéis protestar. ¡Ah, un fascista! Los faches, yá se sabe, esos habitantes de la cueva.

Y entós yo podría rescatar l'archiconocida disparidá ente Victoria Kent y Concepción Arenal sobre'l derechu al votu femenín. Recordái que los socialistes teníen mieu de que les muyeres, empapaes n'agua bendito, cautives de les sacristíes, se convirtieren nel gran exércitu de reserva de la derecha más reaccionaria.

Nun sigo con más exemplos. Colo anterior quiero sorrayar dos cuestiones que nun tenemos que perder de vista. La primera, que'l trunfu del discursu de la igualdá ye una victoria d'antesdayeri. Tamos énte una de les mayores revoluciones de la historia de la humanidá, pero una revolución inacabada y, segunda cuestión na qu'aporfio, la izquierda non siempre lo tuvo claro. Cuando afirmo que ye una revolución inacabada o incompleta refiérome a la peramplia xeografía onde les muyeres siguen sometíes y hasta les mutilen pola so condición sexual. Por cierto, ¿nun tendríamos que cavilgar sobre cuál ha ser l'actitú de la izquierda énte esta realidá? ¿El respetu a la diversidá cultural ha imperar sobre la defensa de los derechos de les persones? ¿Nun somos daqué pusilánimes nesti puntu? Tenémos que lo pensar.

Por supuestu, l'axetivu *incompleta* tamién se refier a la nuestra mesma realidá. A la que vivimos n'Asturies y n'España.

Va un mes, na inauguración de la Feria Internacional de Muestres, recordaba los cambeos nos datos d'empléu d'Asturies ente 1990 y 2017 y aludía tamién a les variaciones na so distribución sectorial. El Principáu cuntaba a últimos del añu pasáu con 25.000 empleos más, anque la población ente 15 y 65 años menguare en 70.692 persones nesi periodu. Son números que revelen tanto la dinámica positiva de l'actividá económica y l'empléu al plazu llargu como la constatación d'un problema perseriu d'avieyamientu que nun convién escaecer.

Sicasí, y davezu nun se-y da la importancia que merez, quiciabes el factor diferencial más relevante nesi tiempu tenga que ver cola incorporación de les muyeres al mercáu llaboral.

En 1990 la ocupación femenina xubía a 122.180 persones, el 33,84 % del total. Un quartu de sieglu depués son 189.000, 66.820 muyeres más. Si añedimos que nesi tiempu'l sector primariu, con una presencia femenina tradicionalmente elevada, esperimentó una perda d'ocupación de 43.475 persones, pasando del 15,78 % al 3,5 % del empléu total, vamos poder facenos una idea oxetiva de la dimensión del fenómenu. Tamos énte una sociedá distinta, y non solo llaboralmente, porque la incorporación plena de la muyer al mercáu de trabayu supón una realidá vital bien distinta.



Ulrich Beck sostenía que, sobre manera nes últimes décadas, diéronse cambios bien rápidos nel contestu de la vida de les muyeres; cambeos que nun se producieron de manera uniforme y llinial, sinón con vaivenes claros de progresu y retrocesu de los que se saca una llinia de movimientu xeneral que va de “vivir pa los demás” a “vivir la vida propia”. Pero ¿cómo se produz esi pasu de vivir pa los demás a esa expectativa grande o pequeña d’una vida propia?, ¿qué enclinos sociales favorecieron esto?, ¿cuáles lo emburriaron inda más allá?

Vuelvo a les reflexones iniciales. Diba ser un exerciciu tan mísere como inútil nun reconocer que l’impulsu primixeniu del movimientu feminista tien un calter lliberal marcáu -burgués, diríen los socialistes de va un sieglu- cuando, como asocedía nel restu d’Europa, el socialismu español anteponía la igualdá de clas a la igualdá de sexos, quiciabes porque entendía de prioridaes y pensaba que nun se podía algamar too al empar. Pero esi espíritu, esi individualismu lliberal yera’l qu’informaba’l pensamientu feminista de Virginia Woolf. Cuando al leer cómo Jane Eyre xubía al teyáu pa contemplar anhelante l’horizonte, denunciaba la situación carencial y subordinada de Charlotte Brönte como novelista y como muyer, al empar que se preguntaba cuánto nun diba ganar el so xeniu si nun se consumiere en visiones solitaries del campu inglés.

Naquel tiempu -que, oportuno, ye antesdayeri-, n’España la burguesía construyere un muriu de ceguera pa nun ver la miseria que la arrodiaaba mentes la tradición católica más conservadora acutaba pa la muyer el papel de madre abnegada o viuda sufriente que fabricaba fíos, bordaba sábanes o vistía santos. Quiero dicir que too foi más dulces y más difícil n’España y que la ilusión pacífica que palpitaba aquel 14 d’abril na Puerta del Sol namás buscaba, en palabres de García Montero, un país onde fore posible divorciase, onde les muyeres tuvieren derechu a votar y onde un credu relixosu nun supunxere una obligación nin un delitu. Pero los políticos republicanos, incluyíos los socialistes, nun pensaben n’avanzar nos derechos específicos de les muyeres, y yá nun digo nos d’otros colectivos discriminaos concretos. Toos ensin escepción diben esprectase si daqué propunxere siquiera’l matrimoniu homosexual anque aquel día naquella plaza tuviere Luis Cernuda, qu’esi mesmu añu empezó a escribir ún de los llibros más guapos de la vanguardia española, *Los placeres prohibíos*, onde la dignidá de los homosexuales ye indixebrable de la dignidá de tolos homes y toles muyeres.

Hubo qu’esperar munchos años y a un gobiernu socialista pa qu’eso asocediere, pero enantes tou aquel procesu d’homologación coles democracies más avanzaes que promovía una igualdá formal anque claramente insuficiente quebró nos cuarenta años d’ún de los desiertos políticos más calcinadores de tolos que tuvo’l sieglu venti. Prometiére nun mentar más exemplos, pero resulta demasiau tentador recordar que’l franquismu dexó al home “el depósitu de la muyer en casa honesta”: si tenía decidida la separación, l’home podía dexar de forma provisional a la



muyer depositada” na casa de los sos padres o nun conventu. Muyer y cosa yeren sinónimos.

D’esi desierto políticu y social salimos. Cola democracia llegó la reconocencia xurídica de la igualdá y tamién la evidencia de qu’en por sí solo nun garantizaba’l tratu igualitariu na vida cotidiana. D’ende’l convencimientu de que nin les muyeres nin la sociedá pueden conformase cola ufierta de llibertá d’elección individual tan del gustu de la política lliberal y de qu’había qu’esixir daqué más en forma de cambeos llexislativos, cambeos nel mercáu llaboral y cambeos nel funcionamientu de les instituciones públiques, daqué más qu’unos derechos puramente iguales, daqué más tamién nos principios básicos de la sociedá.

El socialismu foi, en gran midida, un movimientu impulsáu pola voluntá de salir d’un total dominiu de los dueños de los medios de producción. Güei ta implicáu dafechu n’acabar con otres dependencies, una d’elles, la más determinante, la que s’exerce sobre les muyeres en forma de dominación.

Nes trés últimes décadas producióse lo que Beck llama “la revolución silenciosa”, cambeos fundamentales na vida de les muyeres, tanto na educación como na familia y nel mercáu llaboral.

Porque los cambeos na educación, que foron la fuerzia explosiva de la tresformación, el so factor crucial, nun se dan aisladamente, sinón que coinciden históricamente colos otros dos (el familiar y el llaboral) produciós no que pue considerase una biografía femenina normal. Una biografía caldía más vinculada a una familia qu’evoluciona y ábrese a formes distintes al modelu convencional, porque escluye’l matrimoniu, ye monoparental, los cónxugues son del mesmu sexu... Son rellaciones cada vez más electives que representen lo que se dio en llamar la familia postfamiliar.

Cambeos tamién en términos d’oportunidaes llaborales que xeneren movilidad xeográfica y social que-yos dio conciencia d’autonomía personal. Al revés de lo qu’asocedía coles sos madres y güeles, el matrimoniu yá nun ye’l camín d’accesu a la seguranza económica y al estatus social.

Toa esi gran tresformación producióse, verdaderamente. Y, sicasí, nun fai falta recurrir a les estadístiques pa saber qu’ente los homes y les muyeres nun se desanició la desigualdá, que s’enfrenten a les mesmes esixencies pero nun tienen les mesmes alternatives, que los sos primeros pasos llaborales, por conteníu, organización y sueldu nin tán concebíos pa durar nin ufierten una manera de vida segura y un futuru fiable.

Por si esto fore poco, la crisis económica agravó los riesgos de precarización y de desempléu entá más ente les muyeres y ta impulsando estratexes nel ámbitu individual qu’incluyen l’empléu alternativu o’l regresu involuntariu a la vida familiar. Y ye esa cada vez



más tirante rellación ente'l proyectu vital y la posibilidá real de realizalu lo que ta xenerando la frustración, el desencantu y la inseguranza, consecuencias de “la feminización de la probeza”, en palabres de Diana Pearce.

D'ende la necesidá de polítiques públiques que reconozan y encaren esta realidá y de qu'esa reconocencia se dexa sentir nes discriminaciones, les esclusiones y la invisibilidá. Ye menester facelo nuna sociedá distinta, onde perdió centralidá la clas obrera tradicional, onde apaecieron los nuevos proletarios de los servicios, onde se perdieron parte de los vínculos de solidaridá. Nesa sociedá la entruiga ye: ¿quién lo fadrá?

Yo nun tengo duldes: namás lo pueden facer les fuerces polítiques y sociales que lleven na so exa, nel so centru y na so clave'l combate contra la desigualdá. Digo que nun tengo duldes sobre esa afirmación, pero al empar faigo unes cuantes entrugues incómodos: ¿creemos que'l feminismu ye namás un apartáu más, aunque seya bien importante, nesa llucha? ¿O, al revés, pensamos que'l feminismu supón tal potencial tresformador que ye en sí mesmu una ideoloxía, una cosmovisión que s'impón a otres, mesmamente a la socialdemocracia? O, por añedir otres entrugues más, ¿consideramos que'l feminismu ye patrimoniu de la esquierda, podemos o tenemos qu'apoderanos d'ello?

Tengo una cierta prevención énte la soberbia intelectual, especialmente cuando se trata d'asuntos de tala dimensión. Por eso considero un aciertu que decidieréis qu'esta edición de la escuela de branu Manuel Fernández López *Lito* se dedicare a cavilgar sobre la igualdá. Tenemos muncho que pensar sobre esto y hemos facelo con perspectiva, con arguyu polo que supimos facer, pero tamién con humildá porque nos queda bien de xera pendiente. Sollerto contra la soberbia intelectual porque si siempre tuiéremos razón, si en cada casu llegáremos a la solución definitiva, l'arreglu taría al algame de la mano.

Allárgome con estos precuros porque tenemos que ser conscientes de que la meyora pola igualdá rique una implicación peramplia, involucrar hasta l'últimu filamentu de la sociedá. Nun basta cola lletra de les lleis nin cola acción de les alministraciones. O conseguimos esa impregnación, o somos quién a empapar d'igualdá'l mundu que vivimos o vamos fracasar. Tenemos que pensar que la desigualdá tien esa habilidá que caracteriza a dellos insectos, capaces siempre a atopar un requexu onde s'esconder y multiplicase por más que nos esforcemos en desanicialos. Nel meyor de los casos, conseguimos que seyan invisibles, pero siguen ende, ocultos y resistentes, formando les sos colonies ente'l mugre.

Con estos precuros, sabedores de que la nuestra contribución ye parcial, puedo asegurar qu'Asturies tien un gobiernu implicáu a fondu na igualdá. Si fomos la primer comunidá autónoma n'algamar un pactu contra la violencia sobre les muyeres nun ye por casualidá, sinón porque los



socialistes asturianos fiximos de les polítiques d'igualdá una de les nuesres seños más distintives de la nuestra identidá como gobiernu.

Pero convivimos con realidaes difíciles, complexes. Pienso na resqueiebra salarial, por exemplu. Aproximao, les diferencies retributives ente homes y mueres tán nel Principáu nun 28 % si nos referimos al salariu brutu y nun 19,8 % si consideramos la hora trabayada. Pa facer frente a esta discriminación tomemos iniciatives como la puesta en marcha d'una ventana única contra la resqueiebra salarial, un serviciu que ta allugáu na sede del Institutu Asturianu de la Muer al que pueden presentase consultes y denuncies pa qu'intervengan l'Alministración autonómica y la Inspección de Trabayu énte cualquier conducta que vulnere la normativa llaboral.

Podríemos presumir. Y, sicasí, hai qu'aportunar en que too ye insuficiente. Los sindicatos, por exemplu, tenéis un llabor principalísimu contra la discriminación salarial. Pídvos qu'emburriéis más, qu'asesoréis, qu'ayudéis, porque esti pulsu, repito, nun se gana namás con papel oficial. Equí hai qu'empeñase a fondu pa consiguir la equidá ente homes y mueres, involucrar más a los empresarios, llegar a toles empreses en tolos sectores. Lo que yo vos prometo ye qu'esti gobiernu va seguir tando en primer llinia, poniendo la so iniciativa y la so capacidá. Porque nós nun queremos xubir al teyáu a imaxinar qué habrá acullá del paisaxe interminable de los campos; queremos construyir y vivir l'Asturies de la igualdá.

Declaro oficialmente inaugurada la 18.^a Escuela Internacional de Branu Manuel Fernández López *Lito*.